

学行典

學行典第二百十二卷

孝弟部名賢列傳三十四

明二十 薛大義

按漳州府志薛大義漳浦人貧賤力田供子職父母病篤割股爲羹噉之沒無以營葬負土壘石成墳廬居墓側人稱其墓爲孝子墓

姚仲敬

按漳州府志姚仲敬漳浦人性至孝在親側無疾言遽色父喪哀毀骨立家貧養母結蓑供食母疾祈療無應割股和酒粥給母食之疾尋愈

方一略 陳貞

按漳州府志方一略平和人不知書家貧力養母危病禱於神割股奉之而母病愈又有陳貞者亦以割股事繼母著俱爲縣令旌獎云

王糸彌

按漳州府志王糸弼龍巖人與同邑林京謀要賊京被執死度力不支與兄用興匿山中賊恨其謀必欲殺之糸弼訣於兄曰今吾兄弟勢不可以俱全而父母又年老吾有子三長矣兄子尙幼吾死之其兄不忍次日糸弼乃私自出犯賊而死其兄乃得免鄉人以爲糸弼能盡弟義也處義之謂孝

盧元

按漳州府志盧元漳浦人父卒家貧弗克葬鬻其子於過客既授以直而未攜去一日元採薪山中得金二錠以充葬原直悉還子得完聚人以爲誠孝動天其亦埋兒賜金之應云爾

林初

按漳州府志林初長泰人業農父適田所遇虎初望見直前以身衛父虎懼而退父得全歸鄉人異之有司以聞詔旌其孝因改其里曰旌孝

林端

按漳州府志林端詔安東路人幼喪母父娶繼室生三子父卽沒端貧窮好學事繼母孝御諸弟友值母衰病彌年端孝養倍篤承順親意甘旨之供無不備具母病熱思食甜瓜時非瓜期端遍求諸

處忽獲之良峰山陽掛錢於園籬中攜瓜歸進母母食病爲少瘳人以爲孝感所至

蕭壘

按漳州府志蕭壘龍溪人給事中璫之子性純孝事三母如一嫡母陳氏病癰壘吮之愈庶母阮氏楚撻承顏跪受阮終感悟慈愛如己出遇風雨至父墳哀號西鄰失火將及父司諫坊仰天號訴火遂滅郡守張鵬以其事聞

文盛

按福寧州志文盛字用質母黃氏疾篤剪左腕肉糜之以進粥沸異常母疑之不敢以實對家人亦無知之者後見腕痕乃得狀父嗜鱸見鱸輒流涕必致以薦有終身之慕焉

陳照

按福寧州志陳照少孤貧母病劇醫弗效夜籲天乞減己年以延母壽後封其曾取肉調粥以進母啖而甘之病痊照竟以創歿年二十四

林琦

按福寧州志林琦字宗韓州人思齊子性純孝母病侍湯藥不解衣履逾月趾因以腐緣母病而諳醫督學者重其行試居首擢至省八郡入試者命謁琦聽講舉鄉試知高淳縣

李然

按福寧州志李然字子炎州三十五都人自幼孝謹父母入城必出二三里迎之父雖暮未迄然亦不歸弱冠時父患臂瘡苦甚然晝夜侍左右供飲食徧求醫藥膿汁手敬承之父病篤割股肉和粥父食之輕爽數日父沒母晚年病痺八九年扶持浣滌不少懈及沒躬負土石營葬

劉鐸

按福寧州志劉鐸字彥振福寧衛千戶璵次子以貢授僊居訓導四年以母老歸養母卒喪葬盡禮有鷹日棲軒樹人謂孝感所致扁曰馴鷹

陳應典

按漳州府志陳應典漳浦舟人子少失父事母至孝母病且死應典焚香祝天割股爲糜以進母病隨愈

繆文昂

按福寧州志繆文昂州人母陳氏孀居六旬疾篤甚旬日莫能食文昂告天割左股煨粥母食卽愈壽八十一文昂初無子已立嗣至五十連生二男壽亦八十三

周珉

按福寧州志周珉字勝玉州人璞之弟性至孝少喪父哀毀如成人事兄猶事父日侍兄食每更衣則親爲束帶解帶至白首以爲常爲新昌虹縣學官

陳喜

按福寧州志陳喜字希和州人積學能文而渾樸若椎魯者早喪父獨事母至老不衰母年高多病喜躬侍母寢晨昏溫清自衣服飲膳櫛髮盥洗至牕廁瑣瑣未嘗假手他人兩兒婦謂翁已老奈何自苦如此請代之喜不聽母年九十四始歿益服勞二十餘年如一日喜壽八十

顧中孚

按福寧州志顧中孚三圖人家貧事二親愉愉色養壯歲喪妻不再娶母死哀毀啜粥三年知州史

起欽旌之

周大賢

按福寧州志周大賢五圖人在妊三月父亡成童依依母側不少離夜必拜斗祝母壽第世隸戎籍嘗戍海上夜哀思淚漬枕席當道得其情爲脫籍且白其母之節旌之知州史起欽嘉其孝厚加賞

賚

阮貢

按福寧州志阮貢三歲孤母卓氏力貧守志貢事之盡孝母病湯藥必親嘗目不交睫者逾月籲天乞減己壽以延母壽母八十卒居喪盡禮蔬食水飲百餘日臥起棺旁朝夕哀慟羣鳥集其屋者三既葬刻木爲母像事之如生有遺髮寶藏不忍棄所居延火貢惟奉母像及遺髮以避貧益甚奉像益謹三十年如一日州判李長爲之市屋給粟且躬禮焉

陳德沂

按福寧州志陳德沂字宗魯上杭人與弟德漢友愛四世同居元季兵亂負親避難百里外遇賊傷

臂賊感其孝舍之得不死迨亂平始奉二親還里承歡至老不衰

郭鐸

按福寧州志郭鐸字惟警五歲孤以不逮事父爲恨母病割左股以進妹療疾囑其妻善視之後躬築母墳闢室祀遺像鄉人扁其室爲終慕

林子隱

按福寧州志林子隱七都東坑人事親溫清定省承顏順志居喪哀毀踰常喪葬以禮三年不飲酒食肉哀慕之情終身不衰

李都

按福寧州志李都字世美廩生十歲能文性行端卓事親曲盡孝養居喪毀瘠作哀萱百感至今讀者悲愴廬墓梅湖著有梅湖集

彭驥

弟騰

按福寧州志彭驥字德華弟騰字德高科正之子異母兄弟也性友愛無私財帛門內無間言騰常

公役遠回驥迂於石壁嶺相持悲歌交至驥或鄉歸情亦如之年竝八十終不分異

鄭仁

按福寧州志鄭仁字克己性純篤事親孝年六十喪母是時父年八十出入扶持冬夜以身溫席夏月揮扇躬濯厠臉不離左右承顏順志踰八年父歿祭葬如禮

龔松

按福寧州志龔松字堅夫數歲喪父母哀慕不已稍長痛父母嘗罹饑困繪像懸中堂每食必先獻之雖瓜菓之微不獻父母不分其姊不輒食旣冠或勸其娶泣曰二親未歸土忍言娶乎越數年葬畢始娶兄死非命孤姪患惡瘡躬爲扶抱洗滌侍藥其妻恐相染松曰兄僅有此子但得存活雖相染命也

陳榮 林崇仁

按福寧州志陳榮字勉仁少孤事母孝妻亡不再娶恐無當母意也母久病湯藥浣濯殊無少怠時有里人林崇仁亦孝於祖

徐元吉

按福寧州志徐元吉年六十祖母陳氏病重刲股食之

湯農

按福寧州志湯農母七十病劇思瓜時冬月無所出遍求至朱氏僅存一瓜或戲以百錢方鬻農以貧告以八錢市之歸母怪其價重農曰但得母疾愈何恤價乎

林大興

按福寧州志林大興字于詩州文岐人事其父梅巖能承顏順志嘗剪竹以護菊其竹半枯節上生根懸於地復生筍及父歿廬於中門之外是年海棠花不開紅蓮變白屋有禽鳥朝夕喧不絕至廬乃已人以爲孝感所致

鄭旭

按福寧州志鄭旭字以升州人早孤未冠母病劇夜籲天刲股和粥以進病卽愈

郭奇逢

古今圖書集成
按大田縣志郭奇逢字際時幼以孝順聞稟資穎異過目成誦數奇不第膺貢大廷除授江西饒州通判政尚仁恕士民德之丁父母憂哀毀骨立水漿不入口者數日家人進薄粥一甌奇逢泣而却之終喪獨處一室不御酒肉凡六年祀事必齋戒懇謹墓祭雖遠必躬與勿以衰老懈云

陳輝世

按大田縣志陳輝世邑學生遭喪遇寇出父柩於鋒鏑之下賊被感動不忍刃卒全父柩又賞遇火災出母於烈焰中天爲反風育弟恤憐名多里閭府縣舉孝廉

廖貴

按廣東通志廖貴事親至孝不樂從仕蔬水承歡家庭藹如隱居不仕其子孫皆孝友敦睦人稱爲世孝云

陳文蕃

按九溪縣志陳文蕃三都東華山人兄卒止一子爲鄧賊所執索重幣貧無以應蕃曰姪死兄無後矣遂赴賊壘賂守者陰縱其姪文蕃遇害今苗裔身列雍序足見報施不爽云

紀大振

按尤溪縣志紀大振五十都葛竹人十歲喪父事母克盡孝道母病藥餌無效振乃焚香籲天割股肉調羹以進母病遂痊事聞縣令旌曰真孝格天

朱忠民

按沙縣志朱忠民事親聚順繼母弟竊母衣簪以事撻誦母恐父知憂廢寢食忠民詢其故命工如製以奉於母無難色父晚年好施忠民曲承父志邑令廉狀以上巡按旌曰竭力事親仍給以粟帛

官應龍

按沙縣志官應龍事母至孝兄弟五人應龍居長以家自任意不分箸以免弟累母年八十五卒哀慟幾絕廬墓三年學諭江梅聞于督學胡旌曰孝友兩全

麻育才

按沙縣志麻育才父早逝母踰九十旦夕不離左右忍饑以豐膳先意承志敬事兄長撫育幼弟還將分產盡讓于弟邑令康以孝友特旌

蕭賓

按沙縣志蕭賓事母承歡不怠及故泣血廬墓三年人咸嘆服邑令上其事於巡按旌曰篤孝格天

吳順德

按順昌縣志吳順德字必仁家貧負販爲業出必問母所欲買以歸或得珍味必懷以遺母母年八十餘順德已六十溫飽必問定省必親至老不衰有時歌唱獻舞以悅母鄉人比之老萊子

黃昴

按順昌縣志黃昴篤實不欺早孤母張氏因慟哭失明老疾多年臥牀褥昴晨夕扶持母年九十三而卒始終不替

廖仁端

按順昌縣志廖仁端字元克交溪人性至孝母病百具盡孝時父七旬晨夕不離側起居溫清雖溺器必親三十年如一日孝聲籍甚然畏人知邑令孫欲旌之叩謝曰端居孝名置諸昆弟何地力辭勿上請孫至交溪見端率衆祈雨曰孝子禱必應夜果大雨歸告翁曰廖孝子不可不面異日翁執

端手於龍湖之湄注視良久曰真善人也因指示二孫曰汝曹當學及卒宮七臺爲作孝子傳

盧甫立

按順昌縣志盧甫立號心印官山人父在潮州遭疾立聞馳省日夕禱真武廟願以身代徑詣本道哀懇歸篆促裝歸得終正寢讀禮著存思集及訓族便覽讓祖屋於伯料理其喪分父俸餘於二叔如不能婚葬者代舉焉

鄭榮

按龍溪縣志鄭榮字邦信文山人少勤學父業農命往田所懷書讀之稍長入郡庠爲廩生躬行敦篤事父母孝父歿奉母尤謹授生徒束脩必以歸母有饋遺飲食必供奉己有疾恐母憂戒勿令知或妻有小過犯母怒必衣冠負杖端跪於庭母求命起不敢起有弟性急每大書忍字以警之

鄧邦佐

按龍巖縣志鄧邦佐素行淳樸因母病篤夢神告以割股肉啖之可愈是夜割其股和湯以進母病遂愈咸敬之

柯潤

按龍巖縣志柯潤事繼母以孝聞幼失恃遭亂忘母棺埋所朝夕哀號有老人指其處而獲焉亦人心不可泯處以子元伯贈東陽知縣

林初仔

按長泰縣志林初仔家業農事親至孝父早適田所遇虎按於地仔遙望見之冒前搏虎以身衛父虎懼而退父得全仔亦不被傷鄉人異之有司以聞詔旌其孝改其里名曰旌孝里

董永引

按長泰縣志董永引仁和里人先賢幼穎公裔家貧力農兄弟合食五世矣人有問之曰君家曷能若是對曰昔唐張公藝九世同居高宗問之公藝書忍字百餘以進我則異是吾家以祖父爲大長伯父叔父次之計一家田土幾何子姓幾何任耨鋤者遣之分耕禾登則上之祖父計口量食餘則貯之每飯三席尊者爲一席長者爲一席幼者爲一席食畢婦人席次亦如之絲麻紡績各婦分治成則製衣亦度身而授晝考夕省不令游閒能幹辦者出應公務不煩以胼胝如身使臂臂使指挈

裘領要可不勞而治矣庠生黃履登聞之曰善哉人情得一金則私其妻子甚有闔牆操戈視同室不啻仇敵者今觀董氏一門孝友雍睦有張公藝之遺風焉孰謂古今人不相及哉

張沂

按平和縣志張沂字容潔早肄學宮讀書尙孝悌試不偶爲養親計築室崢嶸山且以招隱焉母李年未艾而眊沂不離頃刻行操几杖食必親授匙箸母劇痢醫莫辨寒熱之症沂嘗糞得其實藥進果效母壽九十六必咨稟後行

陳國萃

按平和縣志陳國萃雲霄人其母爲父出時幼不省比長有知輒涕泣不食反覆幾諫卒感其父而還其母與異母弟分財辭多受少更調其弟所不給稱孝友云年八十

方一略

按平和縣志方一略在坊人幼不知書家貧乏養母病危恐不得愈禱於城隍之神求三等許其割股因割以奉母病果愈鄉人舉實於官縣令朱大謙申詳稱方孝子云

陳紹貞

按平和縣志陳紹貞清寧里人割股以事繼母鄉人舉呈知縣王立準廉得其狀申院行賞

朱龍翔

按平和縣志朱龍翔字恆升家貧舌耕以供菽水父病頻危每夜稽首北辰願減己壽以延父命是夕父絕復蘇果增壽十年母死水漿不入口哭至流血其兄死喪葬如禮按院趙引昌行賞云孝友克敦清修自勵所著有悔少詩集乙亥拔貢子賚翼賚參俱庠生

孫惟中

按山東通志孫惟中字伯庸濰邑人父卒皇皇如欲無生及葬結庵廬其側藉苫以居曠野無人深夜月冷哭聲依稀隨悲風遠聞人爲泣下日啜淖糜二盂却酒肉弗御晨起無火掬雪頰面輒詣墓前拜久之手足皸瘃形容憔悴甚或勸其還哭而不對閭師韓泰亭帥闔巷民言于縣縣尹戴友諒弗之信將廉之伺夜半攜二蒼頭出風雪中抵庵廬而聽孝子聞足音遙問曰暮夜欲何爲戴歎息而去以爲不讓古人亟上之府部使者加以覆察如縣言請旌其門